

**Sing vooraf: Psalm 89:6**

-6-

*Hoe salig is die volg wat luister na u woord,  
hul wandel in die lig wat van U afstraal, voort.  
Hul sal hul in u **diens**, waaraan hul toegewy is,  
die ganse dag verheug, omdat hul in U bly is;  
hul prys u grote krag wat alle krag oortref het,  
en u geregtigheid wat hul weer opgehef het.*

Ons hulp is in die Naam van die Here wat die hemel en die aarde geskape het.  
Geliefdes, genade en vrede vir u van God ons Vader en die Here Jesus Christus deur die kragtige  
werking van God die Heilige Gees.

**Amen.**

**Lofpsalm 2:6**

-6-

*Kom, **dien** die HEER en wees in Hom verblyd  
met blydschap wat Hom huldig as die HEER,  
en kus die Seun in onderworpenheid,  
buig jul voor Hom met vrees en bewing neer.  
Want lig'lik kan Gods gramskap jul verteer  
net soos 'n vuur, eers alte klein geag.  
Wesalig wie Hom huldig as hul HEER,  
wie by Hom skuil en op sy bystand wag.*

Gebed.

**Psalm 72:6**

6-

*Ek sien al vorste, ryk en magtig,  
wat buigend voor Hom staan,  
en al die nasies wat eendragtig  
Hom **dien** as onderdaan.  
Want Hy sal die verstoteling,  
die wat geen helper het -  
die stilverloorne en geringe -  
sal Hy verhoor en red.*

Skriflesing: Josua 24.

Teks: Josua 24:15

**Maar as dit verkeerd is in julle oë om die HERE te dien, kies dan vir julle vandag wie julle wil dien: òf die gode wat julle vaders daar oorkant die Eufraat gedien het, òf die gode van die Amorieë in wie se land julle woon; maar ek en my huis, ons sal die HERE dien. (Josua 24:15 AFR1953)**

Die Here het 'n groot wrewel aan mense wat onder die indruk verkeer dat hulle Hom kan dien en daarmee saam volop genietinge van die sonde kan hê.

Daar was 'n volksvergadering te Sigem.

- Ons moet ook eerlik wees – dit was nie 'n gewone volksvergadering nie.

- Dit was eintlik 'n erediens, want daar staan geskryf dat die volk hulle voor die aangesig van die Here gestel het.

Sigem self is ook 'n besondere plek.

- In 'n sekere sin was dit destyds beskou as 'n heilige plek, want die Here het op hierdie plek soms van sy openbaringe gedoen.
- Die Here het hier aan Abraham verskyn toe hy maar pas in Kanaän aangeland het. Abraham het ook hier vir die Here 'n altaar gebou.
- Dit was ook op hierdie selfde plek waar Jakob die afgodsbeelde wat in sy huis gevind was, begrawe het.

Die plek Sigem preek dus van God se trou in die vervulling van sy beloftes aan Abraham en aan Jakob se dure roeping om radikaal met alle afgodery te breek.

In die gedeelte wat ons saam ge lees het, kry ons die volk op hierdie selfde plek.

- Josua is oud, en hy tree uit sy amp uit. Dit doen hy nou by hierdie geleentheid waar die volk uiterlik en ook inwendig voor God gaan staan.
- 'n Erediens vind plaas waarin die hele volk hulle harte ophef na God toe, en waarin hulle hulle dit die saak maak dat hulle met God gemeenskap wil oefen en sy Woord wil hoor.

Dan preek Josua 'n preek wat presies dieselfde inhoud het as dit wat die Here vantevore op daardie plek aan Abraham en Jakob geopenbaar het.

- In die eerste paar verse word die volk herinner aan die besondere gunsbewyse wat die Here in die geskiedenis van Israel aan hulle betoon het. Daarop rus die oproep om aan die Here getrou te wees.

God se verkiesende liefde word oor hierdie volk openbaar vandat die Here Abraham geroep het.

- Van toe af bestaan die volk nie deur natuurlike omstandighede voort nie.
- Alles wat oor hulle beskik word, is die Here se genade oor hulle.

Veral in die gedeelte van vers 5 tot 7 word dit onderstreep dat hulle deur die Here gemaak is.

- Daarna word die geskiedenis van die volk in Egipteland vertel en dat die Here Moses en Aäron gestuur het en dat die Here die tien plae beskik het.
- Hulle word daaraan herinner dat die Here die Egiptenare verhinder het om tydens die deurtog sy volk enige leed aan te doen.
- So het God sy doel met hierdie volk uitgevoer en hulle begin lei na die land waar Hy hulle wou hê.

Selfs die veronderstelde vloek van Bileam is in 'n seën verander.

- 'n Nuwe reeks goddelike wonderdade begin, waar die een wonderliker en grootser is as die ander een.
- Vers 11 en 12 vertel dat die Here selfs voor die tyd al die vyand se moed verlam het, want daar was 'n keer toe die Here perdebye gebruik het om die vyand te help verslaan.

Dan kom die toepassing van Josua se preek: *Julle het eintlik geen ander keuse nie, as om die Here alleen voluit te dien nie, want julle het alles aan Hom alleen te danke.*

Josua se preek maak onverwags 'n baie belangrike wending. Die volk mag die Here nie net uitwendig dien nie.

- Die vorm alleen is nie genoeg nie. Kom ons stel dit dat dit pas by ons en ons gemeente: kerkbesoek en uiterlike meelewe met die gemeente is nie genoeg nie.
- Daar moet ook geestelike meelewing wees.
  - Daar moet godsvrug in jou lewe wees.
  - Jy moet 'n hartlike opregte mens wees. Jy moet absoluut standvastig vir die Here wees.
  - Baie prakties gestel beteken dit dat jy elke oomblik absoluut bereid moet wees om te breek met dit wat verkeerd is.
  - Wanneer jy tog 'n fout begaan het, en sonde gepleeg het – breek daarmee en moet dit nie meer herhaal nie. Leef net vir God en vir sy waarheid.
  - Daarom word hier die verpligting op die volk geplaas dat hulle alle afgodery onder hulle uit moet verwyder.

Die geestelike toestand van die volk was destyds taamlik suiwer, maar daar was nog baie van hulle wat 'n verskeidenheid afgode gedien het.

- Al was die volk in die breë redelik geestelik voorbeeldig,
- was die swakkeling tog nog steeds onder hulle en hulle kon nog altyd weer die res van die volk besoedel.

Dan eis die Here van hulle daar in daardie erediens 'n openbare belydenis van hulle geloof.

- Kies wie julle wil dien! Die Here bedoel beslis nie hier dat sy uitverkiesing verval en dat die volk self kan kies en dat God Hom daarby sal skik nie.
- Onthou, Hy stel 'n uitverkore volk voor die keuse! Mense wat reeds uitverkies is!
- Maar Hy eis van hulle dat hulle hulle ware kleure moet bewys! Hy wil weet watter waardering hulle vir al sy genade het, want later sê die Here Jesus self dat almal nie Israel is wat uit Israel is nie.

Daar staan dus 'n klomp mense onder daardie verbondsvolk wat nooit die binnekant van die hemel sal sien nie! Daarom word die volk se geloof hier aan die toets onderwerp: Kies!

Josua oefen geen dwang op hulle uit nie.

- Hy gee hulle die keuse tussen twee verskillende afgode, en dan stel hy dit net baie helder dat hy en sy huis die Here sal dien.

Calvyn, die hervormer, skryf by hierdie vers die volgende kommentaar: *“Dis nie sonder oorsaak dat hulle die vryheid gegee word om te kies nie, sodat hulle nie later sou kon sê dat hulle gedwing was hoe om te kies nie. Hulle moet uit eie beweging verplig word om die verbond te onderhou”.*

Die volk is dadelik gretig om saam met Josua en sy huis te staan.

- Hulle sal die Here dien.
- Maar Josua het hierdie volk geken. Hoeveel keer het sy eie oë nie gesien hoe hulle murmureer en opstandig word teen God en teen Moses nie?!

Daarom glo hy hulle nie. Hy sê vir hulle: **Julle kan die Here nie dien nie, want Hy is 'n heilige God, Hy is 'n jaloerse God; Hy sal julle oortredinge en julle sondes nie vergewe nie.**

Die oomblik is een van groot erns, want God verwag van ons om elke oomblik te staan by ons geloof, en die uitlewing van sy heiligheid.

- Daarom sê Josua vir hulle dat hulle 'n groot fout maak as hulle dink dat hulle kan voorgee dat hulle die Here dien, maar die sonde geniet wanneer hulle kan.
- Prakties beteken dit dat ons altyd in ons lewe bewus moet wees daarvan dat die Here ons sien.
- Ons moet met elke ding wat ons doen, wys aan watter kant van die geloofslyn ons staan.
- Dit beteken dat ons 'n bekeringslewe moet leef, of anders bewys ons dat ons eintlik burgers van die hel is.

Die ding is nie bedoel om ons kleinmoedig te maak nie, maar juis om ons te laat waardeer wat ons van die Here ontvang het, en om ons dan aan te spoor om dit reg te benut.

- Ons kan nie heul met verkeerde dinge en dink ons moet nog vir die Here ook aanvaarbaar wees nie.
- Daarom hierdie ontsettende swaar aanspraak: Julle kan die Here nie dien nie, want julle moet onthou Hy is heilig. Hy sê nie een ding en doen 'n ander een nie!

Broeders en susters, laat hierdie preek van die Here ook vir ons geld.

- Laat ons dit ons saak maak om so skoon as moontlik van die sondes te leef en so sterk as moontlik in die geloof, en laat ons die genade van die Here so veel as moontlik waardeer.
- Dit is ook die genade van hierdie preek.

Die Jode het net die geskiedenis van hulle voorvadere en die uit- en intog gehad. Ons het die Here Jesus.

- Goddelik het Hy geleef – vry van oortreding.
- Hy het gesterf soos 'n Magtige oor die dood.
- Hy het aan ons ook 'n land gegee wat klaar bebou is – soos wat Israel destyds ontvang het - maar meer nog, want ons land is die nuwe aarde, en die stad daar is deur God self gebou.

Ons het baie meer genade en daarom staan ons ook seker skerper in die lig van God se oordeel as ons hierdie genade misbruik. Daarom moet ons lewe elke dag die woorde van Josua uitspel: **EK en my huis, ons sal die Here dien.**

**Amen.**

Slotgebed.

Slotpsalm 103:11

11-

*Verhef die HEER, o al sy leërmagte,  
sy **dienaars** wat Hom **dien** as troue wagte!  
Laat hemel, aarde en see en berg en dal,  
waar ook sy septer swaai - laat alle dinge  
sy lof verhef in altyd wyer kringe!  
En jy, my siel, loof jy Hom bowenal.*

Die HERE sal jou seën en jou behoed;

Die HERE sal sy aangesig oor jou laat skyn en jou genadig wees;

Die HERE sal sy aangesig oor jou verhef en aan jou vrede gee.

**Amen.**

Dr. M.J. du Plessis  
Gereformeerde Kerk Bellville  
Datum: 6 Junie 2010